


泉亭吳公文集  
利



過庭私錄墓誌目

明廣西布政司左叅議臬亭吳鼎著

仲子吳遵晦錄

胡端敏公墓誌銘

誥封曹淑人墓誌銘

劉仲賓墓誌銘

封監察御史李公墓誌銘

徐臨江墓誌銘

張愛山墓誌銘

朱孺人墓誌銘



鄭處士墓誌銘

孫氏妹墓誌銘

林子謙墓誌銘

許時久墓誌銘

張安人王氏墓誌銘

許小泉墓誌銘

沈母虞氏墓誌銘

周處士墓誌銘

長沙府同知唐公墓誌銘

誥封南京刑部廣東司員外郎劉公合葬墓

誌銘

胡子孝墓誌銘

李母顧氏墓誌銘

王良臣墓誌銘

勅封孺人羅氏墓誌銘

姚母仰孺人墓誌銘

姚孺人墓誌銘

周母孫氏墓誌銘

梅月周翁合葬墓誌銘

姚孺人墓誌銘



徐母潘安人墓誌銘

陳文量墓誌銘

陳恭人墓誌銘

郭通判墓誌銘

銘施長史魯自撰墓誌

過庭私錄墓誌目終

過庭私錄卷之四

胡端敏公墓誌銘

嘉靖九年秋九月丙辰晦致仕 太子太保兵部尚

書胡公薨于家 天子聞訃輟朝 賜謚端敏策贈

少保遣官祭凡九勅有司營墓墓在五雲山之岡其

子純十十年九月癸酉襄事請銘公諱世寧字永清

別號靜菴世杭州仁和人祖諱嵩考諱瑤俱 贈吏

部右侍郎祖妣張氏妣馮氏俱 贈淑人公起家昌

化諸生舉弘治五年鄉試第二人六年第進士八年

授德安府推官十三年拜南京刑部主事十八年署



員外郎 教皇帝即位詔實授加奉訓大夫正德二  
年署郎中三年出爲廣西太平知府未幾以母喪去  
職六年復守寶慶七年擢江西按察副使兵備東鄉  
十年命爲福建按察使未拜而坐前告言寧庶人宸  
濠反謀謫戍遼東十五年起徙中孰家拜湖廣按察  
使旋擢僉都御史巡撫四川 今上改元以吏部右  
侍郎召聞父喪還四年以兵部左侍郎徵入五年改  
南京吏部六年拜南京工部尚書是年秋以左都御  
史徵拜刑部尚書未上加 太子少保左都仍舊入  
見辭免官保俄改刑部尚書七年轉兵部加 太子

太保八年得請致仕已而 召起南京兵部尚書叅

贊機務 太子太保仍舊公固辭不拜而明年薨矣

享年六十有三配李氏 封淑人子男一純也錄爲

太學生女一嫁富陽學生何樞公幼有大志數夢偕

于少保立朝與議軍國事其學務實用凡規爲建白

具出定見決非偶然者爲人廉約剛方遇義不可毅

然必達其志不肯養交安祿專心奉 上而已然亦

坐是寡合遭訕怒初爲推官以才節著應風憲召顧

拜留都散郎久之得補遠惡郡郡領州縣率土官雅

不庭叅公下令延訪長吏土官有來謁者推至誠與



語却絕其餽獻及因他出過其營單騎直入坐帳中  
縱閱騎射良久乃還他日子弟應嗣官者輒爲任之  
良厚由是民夷感其恩信唯太平州李璿悖父據印  
坐法不就逮公知龍英州趙元璿善用兵密檄其捕  
璿且授之方略元璿乘璿不意猝起師攻之飛炬焚  
其州治璿走保山寨未拔公解衣齋犒元璿曰以吾  
衣贖一州生靈也寨中兵聞之感泣解散元璿擒璿  
及其印章名馬來獻公發璿所聚粟以賑被困之民  
且悉除其租賦一年遂能懷服諸夷治聲大起其爲  
兵憲時宸濠反有狀人莫敢言公獨上疏畧曰南昌

失火延燒萬室基地便利盡歸王府債負所責遍及  
閭閻庄田所侵激民立寨都司布政司按察司官多  
爲鈐束問刑叅吏受成而行近者買辦漸行於外府  
騷擾遍及於窮鄉臣下懼有隱禍多懷二心禮樂政  
令漸不出自 朝廷地方之事益有可慮者矣寧王  
自得衛兵以來威勢日橫而上下官司承奉太過臣  
請戒諭寧王遵依 祖訓止治其國內官僚  
勅鎮巡以下官凡王府所委事必須奏可方行庶幾  
小民有再生之望地方無意外之虞累千餘言不果  
用濠乃賄結諸用事者計欲殺公杜衆口而指摘疏



中禮樂政令不出 朝廷諸語爲離間親親妖言誹  
謗奏逮公捕繫錦衣獄考掠困篤於是給事中御史  
交章訟公寃久之得減死論及濠反書聞纔議除公  
謫籍還鄉里待次 今上更化首以忠直受知馴至  
大用矣其自留都召入當路者頗有力然公不肯與  
黨坐臺僅踰月忽更司寇實疎之也迨陳九疇獄起  
人始服公持正九疇爲兵備時有禦土魯番之功先  
機倍殺其內應夷人事連故總制彭公澤至是憮人  
聶能遷上書言哈密不能興復由九疇啓釁徵陳下  
刑部獄蓋時有王之者將議陳極刑奪彭爲編氓公  
嘆曰使我典刑獄而殺一忠臣吾寧先死乃密疏爲  
彭陳申理人爲公危之頽 聖明感悟九疇得不死  
然王尚書瓊遂主通番以復哈密爲任會公拜大司  
馬得竟其事具列夷情變詐非由啓釁今圖復哈密  
無益而歲受土魯番之挾我爲奸利則宜有覺而速  
改因陳轉危爲安之策意在勿勤遠畧專撫近邊  
上悅其言屬時宰有所軒輊遂不盡用其策公又疏  
請增武備足邊儲而薦馬吳陳九疇施儒楊必進堪  
統軍旅 上爲起馬都御史吳將用之他亦付所司  
議行矣桂冢宰詆公侵官疏吳不可用事中止公遂



引疾求去且以任人圖治之要爲 上極言之  
上留公公求去益力 詔乘傳還鄉里優賜輿人月  
廩未幾 上更諸用事臣思公強起之公遂稱疾篤  
然猶勸 上圖廣嗣育容受直言愛惜人才云公所  
至具有政跡立朝隨事效讜言多不詳紀紀其大者  
以銘其辭曰維南有鴟天監厥慝乃錫忠貞鎮衛  
社稷蹇蹇正言式遏寇賊居東四年罪人斯得以我  
公歸保乂皇國更踐四卿文武作憲匪躬是謀嘉猷  
入獻自牖納忠此曰當同違衆匡拂彼曰沽直憂心  
如惓孰窺其極刺姦若讎體國若子秉志不回誓以  
九死好爵弗縻捨車就徒高朗令終足愧鄙夫有躡  
名山有折大江有莪茲封與國無疆

誥封曹淑人墓誌銘

曹淑人者故御史中丞錢公鉞之繼室也諱淑和杭  
之仁和人考曰曹用妣王氏以正統十一年正月己  
卯生淑人端重寡言溫惠人也少議婚輒不諧卜相  
皆云當大貴年踰三十歸于同郡錢公錢公時爲汝  
寧太守喪其初妻故與曹姻家雅聞淑人賢因納幣  
焉不數載太守三遷至都御史更巡撫山東河南貴  
州三省才名籍甚雖中丞明達剛毅自致大受而聞



內修潔外言不入訓育諸子女臧獲唯謹使公專心報國無內顧憂實淑人推轂力也弘治十三年

制命褒封今號爵三品果符卜相之言中丞薨在正德二年既塋而豎瑾之禍作矣初瑾有門下中官暨中丞同事貴陽為中丞所裁恨甚他日語瑾錢鉞顯宦五十載積貲可鉅萬瑾利其財構中丞前巡撫河南時奏易王府祿糧為罪矯制籍其家使者簿錄遺資大不讎所言懼不滿瑾望至毀屋及墓鬻圖籍故器勒民倍直吹入瑾闔郡騷然執淑人以下凡五十六人纍然北去屬嚴寒困頓殆死械繫踰時獄穽

不可成則據其首飾違禁盡室西遷分戍固原莊浪肅州三軍淑人隨固原當是時諸尚書爭之不能得山陰王司寇鑑之坐是免官嗚呼豎禍烈矣居再踰年為正德庚午會赦得釋而家人亡者十五六矣行抵闕聞瑾伏誅詔罪狀瑾首以都御史錢鉞受害為言於是還淑人封誥稍稍償故籍物而任子

應福亦復錄用矣九年任子為福州府推官淑人隨福州福州君躬備孝養十五年還自閩依故址構堂奉淑人子母煦煦相樂也居十有七載為今

上之嘉靖十五年九月庚申淑人卒于正寢年九十



有一嗟乎貞女未遇吉士孱然不出房闥及作述君子受天之寵貴在日月之際固命也夫中遭奇禍繫引幽囚罪且不測竄身萬里雜居戎狄之間以淑質老寡當此寧自冀生還哉而竟生還也重享祿養至耄期之壽又非命乎彼豎竊弄天憲欲制人之死命還自覆滅天道惡可誣邪余聞淑人被逮過涿州時病利下劇甚諸子倉皇泣治後事忽遇異人授真人養臟湯一飲輒愈不然死道路矣更三十載而正終首丘寧復有遺憾乎初有子男應禎應祥應祺應禧應福應祿凡六人應祺爲瑞昌王府教授應祥及應祿俱昌化學生女子一人適總漕指揮王輝淑人唯生福州君而應禎前吳淑人出他皆側室子女也孫男十有一人孫女七人諸子存者應祺應福應祿以卒之後三年某月甲子祔塋淑人于中丞壙吳淑人之次地曰佛牙塢其緩也以令合官爲營塋而請未得云銘曰允矣淑人克慎其身標梅傾筐豈不懷春賢侯迎止百兩其輪夙夜僮僮于以采蘋帝服有章錫爾賢嬪遭家多難如彼糾纏何以速我獄何以殛我族亂匪自天寺人之毒無陂不平乃推而復號咷后笑乃見天則維昔之富維今之疚不震



不騫宜爾眉壽亦既昌厥後亦既終厥牖天保定爾以莫不厚凡爾子孫聿念爾舊

劉仲賓墓誌銘

仲賓諱景寅其世系郡邑具余所誌乃考栢山公壙中仲賓請舉順天府登正德十二年進士授山東平度知州陞南京刑部廣東司員外郎叙進福建司郎中調兵部武選司無何致仕尋卒于家年四十九嘉靖十一年夏六月朔也有一男曰贊先一年殤一唯二女長嫁餘杭徐鐸妻錢宜人出也幼側出許聘仁和畢發竟無子族議立從兄子真爲仲賓嗣久之不

克襄事友人湯溪胡森仁和徐顥胡純皆以貲助喪嘉靖十三年冬十二月二十日真乃塋仲賓于臨安洪墓山闔人陳則清爲買石以志錢唐吳鼎序而銘之初仲賓仕留都今宰輔張公桂公二黃宗伯時爲同列朝夕聚談律法禮經間及天下之務而仲賓論事多大畧時出其絕識人固偉其才其爲人又廓落坦夷不立異同衆益與善諸公旣柄用而薦引仲賓入武部居二載多所釐正人不可干以私有將官匣金書裝之閭投仲賓仲賓閱實叱還而日宣言于衆訖仲賓在部不得倖進後其人獲拜大將至挫師虞



國云然仲賓直已行不恤共事者怨忌與人傾蓋語  
輒盡其肝膈以是竟遭構陷王化者傾險士也以戶  
曹主事得改御史其按浙有穢行仲賓嘗以白其院  
長李康惠公而不密也及嘉靖八年秋張桂壘罷政  
黨議起而王化患人以阿附目已輒上疏陳首反劾  
任已者及引仲賓輩數人爲自脫計事下吏部有謗  
仲賓嘗納張容賂許爲營恩澤者議請貶官被

命以原官致仕張容者太監永之弟永有捕反者功  
遺表乞官其親屬事下仲賓痛裁抑之疏草具在鼎  
亦聞胡端敏公言張永恩澤宜與以勸中官仲賓顧

恡之數趣令覆奏亦徐徐不爲意疑仲賓有憾于永  
蓋永事下時胡公實大司馬云嗚呼豈知讒人反諸  
仲賓私容邪語曰女入官見妬士入朝見嫉豈不信  
然今仲賓蓋棺貧無以葬妻妾餬口不給武選之賄  
安在哉他日詹事南海霍公序贈寺丞姚奎亦及仲  
賓以爲枉噫吁嘻枉令純臣被汙失職憔悴以死而  
公論之明無及也悲夫曩余與仲賓議獄見其依于  
仁厚有古長者風意其后必大乃今斬然豈天亦弗  
諒之歟昔藥盈改行脩德可免於難而竟絕世非身  
之罪也春秋閔之今士大夫於仲賓每亦云然可哀



也巳銘曰茲山靡苓胡采我墳茲山有虎不食諸人  
吁嗟乎仲賓

封監察御史李公墓誌銘

前侍御李君時行遺其友人吳鼎書曰先公遊閩越  
時見群籍滿肆慨然嘆曰是奇貨不可失至鬻其衣  
裝盡市學士家言以歸昇循義曰大吾門者在此已  
聞郡中通經術有師道者若子弟茂才異等輒令循  
義與遊雖甚匱不減供億諸費於是循義獲舉進士  
矣已而就養池州姻家訪諸池有厚望公曰柰何以  
姻故令兒毀操乎俾持券歸取吾家故物塞其意匡

飾多此類也義徵入臺不無由哉及領郡符因間歸  
省浹旬而公病且卒矣吾門以報吾親子姑爲我銘  
墓鼎以未識公辭則來示棟塘集而讀其傳記歌頌  
詞旣深美其人咸名卿大夫今天下號能文章以節  
義德望重者而公行事豈不然乎按狀李氏世寧波  
府鄞縣人自諱鼎者生廸廸生端三世俱明經爲鄉  
校師端配汪氏生公諱正華字本素初封文林郎直  
隸池州府推官改封山東道監察御史階仍舊棟塘  
其自號云娶何氏故禮部主事瞻之孫女封孺人何  
孺人產四子一女曰循仁先卒曰循義是爲侍御按



部江西俄拜程蕃太守曰循禮亦卒李曰循信女嫁  
邑人聽選官吳湘側室男子一人曰循智今亦卒孫  
男十五人生明生威已補縣學弟子員女孫四公生  
天順二年十有一月辛亥卒嘉靖十三年正月丙午  
凡春秋七十有七卒之明年十有二月壬寅葬其邑  
龍山之陽公少習舉子業不成又不肯事家人生產  
壯而好遊於是四出上武夷浮沅湘渡江踰淮遵齊  
魯之故謁闕里登岱嶽留滯燕趙之墟徊翔兩都所  
如不偶以布衣豪睨一世志邈如也而尤樂吾杭西  
湖旣老猶偕樂澹君東軒大夫澹菴先生裹糧來遊

龐然鬚眉衣冠偉博望之莫測其何爲者初族有孤  
女不能嫁公嫁之裝如已女昆弟子貧無貲公輒與  
貲仲弟闌出財物與東夷互市而負夷錢數千緡官  
捕治急公破產爲償脫仲弟於厄於是宗族莫不多  
公而族顧有造禍中公危法者公旣以理自辯數得  
解已貴受封顧施惠其人於是宗族愈益多公矣郡  
俗尊祠鮑神無賴巫歲假神生辰輿偶像遊市中歛  
錢物次及公家求弗與巫故旋像當公門不去佯謂  
神靈使然公奮擊像碎曰是能作禍福者我當之由  
此巫不爲姦利公竟無他嘗有盜夜入公室公暗觸



之盜急刺公傷鼻血出沾襟燭至視盜乃素識平生者縱之去後創蹟隱然人問盜誰何公匿不語姓名由是識與不識咸稱公長者余聞慈谿秦太守金云金曩謁公棟塘舍中會其家人輟耕歸咸短衣屨而鋤笠金偉視中二三丈夫非傭畔者問知爲侍御諸弟金大驚謂公已豐亨何苦諸子如是公正色曰吾中子雖有祿秩顧餘子齊民爾安可不令躬耕因自舉其詩子分耕讀不妨多云秦大歎服嗚呼公能使家人忘其貴勢所以貽之良厚矣夫銘曰惇叙類仁燕翼類智含垢類弘攘邪類義負竒壯遊孰窺其秘吾弗得而名銘以俟夫來世

徐臨江墓誌銘

君諱顥姓徐氏初字希道後更子淳別號龍山云世居浙江之瀕爲杭州錢唐人曾祖克敬附籍仁和於是更爲仁和人祖誠考聰以君貴封承德郎南京刑部廣東司主事母潘氏安人君生弘治八年八月丁卯幼學胡氏春秋穎敏絕人屬文弘肆下筆輒千餘言年十八爲郡學生明年卯角應試才名已籍甚矣正德十一年舉鄉試高等十五年會試中式明年辛巳今上初策士賜君進士出身授南京刑部廣



東清吏司主事廣東司職理京畿中訟獄號繁劇難治君既明察彊力有執守日夜孜孜究心法家言踰年大閑習所書獄辭老吏不如也同舍郎有疑獄多就問君君咸爲代剖無不如其意所欲出諸郎咸自以爲弗及由是練達刑名之譽奕奕播留都間而君顧耻以刀筆自居折節講學慨然慕程明道朱晦庵之爲人君素倜儻不羈高論時出人意表至是一變頓爲沉默簡重意氣雍容如也嘉靖五年進本司員外郎尋轉貴州司郎中就署內建澄心亭暇輒靜脩于中七年聞承德君計去職起復除刑部陝西司當是時蘭谿唐公爲少宰廷訪天下奇士士多推轂徐君者唐公就見君驟問責難了君何謂之難對曰君所謂可而有否焉臣獻其否以成其可君所謂否而有可焉臣獻其可以去其否茲何容易矣而老生常談堯舜之道爲難奚其難唐公悅以君任大用薦爲儀制司郎中蓋殊調也 皇上方嚮意秘 古禮文之事札下春官無虛日君咸爲草創其儀 鈺 遺謬者預賜敬一箴大禮集議大學衍義諸書屬天下歲貢生候部至二百人君爲建白聽其附試京府以廣旁求路蓋禮部歲貢生預鄉試始此君亢厲守高公卿以



下于請一切不行要在絕私交行已志專心報

上而已以嚴見憚不得久居內遷拜臨江太守躬勤庶政常夙興以矯游惰摘姦發伏如神吏民莫敢欺他如去門卒通壅蔽刻題名表官箴作郡誌紀文獻祠旗纛修武備皆井井規畫利當時而法後人赫然良二千石矣而達官貴人取道臨江泊舟去府治且三十里君雅意不游聲譽非大事弗出郭要人請託輒拒之曰寧負權臣不負吾民又郡中貴彊之家抵禁痛繩以法不少貸治郡幾五載不遷以考績行過家居兩月一疾遽卒時嘉靖十五年十月辛卯年四

十二矣嗚呼悲夫君嘗曰大丈夫終當血食後世余謂以彼其材出入禁闥陳說國體聽微決理使天下無冤民詎不當樹大勲德邪乃鬱鬱久居郡齋志短折爾矣可勝恨哉君少時善飲酒承德君誡之遂絕口不飲及鹿鳴舉解猶以未奉父命為辭承德君嘗患怔忡疾君事之湯藥消息曲當其意不解衣半歲父歿而養母太安人躬備甘膳家事必稟進止廩祿貨財悉委於三弟頤頤而傾囊助頤輸資為太學生其內行孝謹如此娶郭氏故贛州別駕廷佐之女封安人產文曰中饋許配吾兒遵晦長男曰立言季



子曰立宰皆嫡君亡而側室產一女與仲子立德同  
母凡三男子二女子君卒之明年冬十二月丙寅立  
言輩從諸叔父塋君祖禰塋兆之東地里山名具載  
承德君壙志中銘曰賁育可以干城而俾牧羊鑿鄒  
可以斷犀割鮮用傷有材匪常孔碩且良亦旣用童  
云胡弗張云胡弗長悠悠彼蒼

張愛山墓誌銘

杭故江南一大都會千金之家率以賈勝不尚儒術  
其子弟雍容襲紈綺膏粱為游閒公子之態雖有美  
質弗學蓋鮮有裒然選首恢弘鄉里之化以廣厲賢

材者焉嗟乎父兄之教不先子弟之帥不謹也而比  
乃有年少取青紫率先郡國自是勸學講議比屋延  
師靡然嚮風彬彬為俊國矣仁和愛山張君非所謂  
開其風者與君家三世饒于財厥考諱綬鄉邑推其  
長者嘗受邵陽唐御史褒遺上尊束帛然未遑庠塾  
之事也初娶趙氏無子卒再娶林氏葉氏君出于林  
為長子弱冠以貲補行省承差釋褐需次于家已吏  
部徵君將用之固謝病免喟然而歎訓諸子興於學  
詳延方正博聞之士使為子師脯修館穀唯謹日月  
省試具有程式其專隆教誨如此於是張氏諸子弟



咸奮矣嘉靖十年中子濂鄉舉第一君謂之曰吾杭  
發解自李吏部來五十載乃小子續之意望至矣顧  
未知爾所圖終也十六年冬君寢疾濂當上禮部留  
不欲行君趣之行曰吾目待爾乃瞑明年濂試春官  
高第驛書聞君含笑起牀簣坐曰吾目瞑矣無何卒  
實十七年三月癸卯晦春秋五十有九嗚呼可謂基  
之而見其構播之而見其獲者哉吾黨以爲美談曰  
生子者猶望如張愛山也進士君方入御史臺觀政  
聞計奔喪歸謀諸兄弟卜明年正月癸酉塋君靈鷲  
山之麓與吳夫人同穴以許泰州狀屬余銘墓誌之  
曰張君諱應禎字元兆有官不居自號愛山居士平  
生廉辯有口持論直前無回忌遇合已者疊疊移日  
不倦即不善輒面適之使人類泚無所容人以是多  
不樂君至爲訾謗君亦不顧自其天性也然親禮貧  
交昆弟事親孝臨財廉與僮僕共疾苦身富給而不  
爲紛華盛麗士亦以此多之通醫術諸方伎雜家言  
能讀秦漢以下史識度卓然蓋于一族雅爲縉紳先  
生引重云君娶于吳側室三人凡生八男子曰洪曰  
江曰濂曰沐曰淞曰濟曰激曰泮五女子曰德正曰  
德莊曰德恒曰德方曰德端孫男二曰榜曰樞孫女



十人濂已有聞江沐榜三人皆學官弟子其銘曰  
靈山有梓靈泉有芭良士豈不仕施于孫子亦既觀  
厥成亦既駿厥聲譽髦其繩哉

朱孺人墓誌銘

朱孺人者明詩人雪村王先生配也生長男一槐爲  
臨淄令初仁和朱子容贅東望王家而生孺人東里  
王家海賈也多寶玉諸奇物孺人視等瓦礫不私其  
一簪以故統綺子求者其父母率不與竟與王先生  
王先生亦仁和人諱澄字天碧少忼慨有高志不事  
家人生產作業雅好讀書泛覽子史百家言至廢眠  
食然徒資用作詩兼工晉人書日從東溟公鶴臆先  
生諸詩人飲詠西湖間中以親故起去爲昌化縣掾  
已更爲處州府架閣庫主吏獨身往留孺人侍舅姑  
舅姑安之先生第客死南海遺孤纔七月先生令孺  
人抱哺之孺人育如已子是爲二槐先生訖事兩考  
當受事京師而竟棄去益徵故與游者置酒高會縱  
觀廣麗飲酣輒相和爲歌詩留連累日不問有無細  
大悉委孺人孺人心知其以不偶故時時爲辦具美  
飲食務順適其意先生年四十六而病病且亟孺人  
禱神代死至剖股肉進先生竟不起手札遺孺人以



二老爲累終吾志者必長男也可令業儒二槐三槐  
汝量授藝焉期母負三槐孺人季子也當是時家徒  
四壁立惟郊外田五十畝舅姑皆已年八九十老人  
子女五六孩幼尪細又無他生事皆取給孺人孺人  
黽勉當之淒涼閉戶索寞入厨者非一朝夕矣至或  
凶歲佃人不入穀征吏擊門老者咿嚶不能言幼者  
又不能出應乃孺人忍詎彷徨檢奩而償之其茹荼  
類若此舅歿歛塋如禮姑歿又歛塋如禮齋長男爲  
仁和學官弟子二槐攻金三槐業醫咸遵遺令云蓋  
先生歿後十有七年而長男舉于鄉又七年舉人爲  
銅陵學教諭孺人從銅陵孺人性嗜魚蟹見山澤則  
顧喜銅陵江縣也所嗜有之及學諭遷臨淄縣知縣  
孺人復從臨淄臨淄稷下也所嗜又有之而十年之  
間數見上官以禮勞列其子輒喜都御史御史以其  
子名行表薦於朝者七孺人則又大喜謂臨淄曰平  
生王雪村給事郡縣曾不霑一命今汝爲邑長於斯  
奔走群吏受天子大臣尊寵如是期砥礪無負先  
人志可也久之孺人思歸歸再逾年爲嘉靖十二年  
皇子生詔加惠海內諸郡國七品以上文臣三載  
無過舉者得封其所生孺人應封杭守婁君獨奉



詔至門先是孺人寢疾 詔至起冠帔拜命榮顯矣  
而顧悲泣數行下語賀者曰平生王雪村乃不及見  
今日具道遺令云云且曰吾且夕入地傳語吾子必  
有以報國也無何竟卒是年十二月十日也春秋七  
十有四孺人所生三女皆前卒臨淄未有男子亦三  
女二槐有一男曰燭三槐亦一女臨淄令曰吾父墓  
在丁家山濱湖謀合塋卜不從從術人言將以嘉靖  
十四年冬十二月甲寅別塋吾母錢唐王岑山屬鼎  
銘會 勅下贈王澄文林郎如其子官朱氏爲孺人  
兩制辭咸信美云鼎讀王先生羨藜集而重嘆孺人  
之賢焉大丈夫以鴻漸之翼混跡鷄鶩已又不竟其  
業非籍文墨陶寫謔浪丘壑安能少舒其憤懣邪向  
使遇買臣婦雖欲謳吟道中亦何容易爾及觀孺人  
垂亡須臾躬覩寵光且 贈命及其塋期常若有爲  
爲之者豈非善人必饗其報哉雖不合塋固宜併列  
先生始末以志其銘曰同穴非古矧虞陵谷蕃膺斯  
丘協于吉卜如岡如阜以隆厥後爾後孔有爾冢孔  
久爾名不朽高士之偶賢侯之母

鄭處士墓誌銘

嗚呼是鄭處士故太常璫夫先生季子也太常以高



第經術聞于一時身故無他貲儲而家燬處士嘆曰  
不可當吾世隳先人門戶乃往殖貨江湖間或尤之  
曰子儒家也溺于商邪處士曰余聞之先人云子德  
休明雖處賤才也其姦回饕餮雖鼎貴不才子也余  
懼無令德以紹前聞商非所病焉凡勤約二十餘載  
克以貲歸乃堂乃構繩繩而粟粟焉曰是不足守宗  
桃乎哉遂不復出太常有梅花書屋燼焉處士泣慕  
曰是梅吾家三槐也新其室像事太常日偃息婆娑  
其側賓至輒出世藏圖冊觀之間娛以觴奕而談先  
正文矩官範疊疊也入室者獲聞盛時前輩風烈焉  
夜則令二子執經讀而聽之至宵分乃休以是終其  
身嗚呼若處士可謂克負荷矣始太常官兩都或不  
携家累唯處士隨嘗受學張孟端先生故出入飫聞  
至訓德器夙成遭太常薨于邸獨斂以歸不愆于禮  
會時宰欲援其入胄監力以非序辭士論義之平生  
友睦二兄孟繩孟經對妻子如賓臨財不苟數施舍  
折券有負之者亦弗詰也或詬之輒應以溫言故終  
身與物無競鄉里稱善士善士云處士諱孟紳字宗  
儒嘗植松輦石於庭曰松耐久石堅貞自號松石太  
常諱環進士及第累官南京太常少卿妣潘氏封孺



人太常出自南京刑部郎中諱厚刑部出自封奉政  
大夫修正庶尹南京刑部郎中諱璧上世自汴徙越  
再徙杭爲仁和縣人有 明嘉靖十年秋七月癸亥  
處士病卒邈其生天順二年夏四月甲戌凡春秋七  
十有四始娶王氏故郡博廷謚之女早卒再娶吳太  
守美中之兄女二子吳出也曰存曰布俱縣學生孫  
男四曰蒙亨謙亨復亨震亨卜是年十月丁酉塋處  
士于石壁山碧梧之原從祖兆焉太守吳公狀云銘  
曰世祿者鄙世德者減有潛季子濟美太常志復厥  
始乃士而商用緝厥比亦孔之光温温恭已終莫之  
戕從先人于是允曰歸藏

孫氏妹墓誌銘

吾同胞三人二弟皆女此其季也先府君諱宗裕封  
承德郎南京刑部江西清吏司主事妣陸氏贈安人  
弘治十六年癸亥十月十五日生吾弟于錢塘城北  
隅魚行橋之故居字之曰珩玉年十八而妻仁和孫  
鸞縣學生其翁曰憲姑沈氏弟嫁十年而病痿痿四  
年而死嘉靖十二年癸巳十月二十五日也止一女  
曰待元是年十二月二十二日塋其邑東山街從孫  
氏之先兆焉昔季路云吾寡兄弟而弗忍也今而後



知斯言之悲吾憶喪母時吾年十八弟八歲爾一錢半縑糲蔬卉褐彼此更共如左右手遇饑歲弟恒半殮留殮殮我士友時來講藝或乏童應客弟至婢服執茗飲出獻舉人俞文祥善相人者也鑑之曰此淑姿豈真婢邪予時爲羞澁吾母遺貲裝無幾弟又盡推以贈其姊予約倖有祿時爲營裝償之逮予享梁肉飽妻孥擁騶從時而不獲與弟共之吾負吾弟悲夫初歸孫氏也頗得其舅姑歡心居數年竟以其夫學無成名俾夫婦別食而無一壠之分一金之產弟徒易所佩用爲田爲舟以謀朝夕且給其夫遊學屢

至絕糧旣病時乃指脯日語予曰曩時日景至是我尚未克晨炊唯飲泣塊處一樓咎其盍不以告予則曰恐重爲兄累爾嗚呼疾所由來固矣吾不能周吾同氣使不能糊口窮蹙以死尚誰咎哉悲夫去年吾見待元衣故紅繒詢知猶予爲諸生時有司所犒束帛也計其藏二十年矣身後製歛衾檢其篋得嫁時線用之其縷積銖累儉以圖永類如此克諧孫氏予弗能詳知然觀其善事吾繼母戚安人與吾妻周旋十九年未嘗有迂言歿之日吾家奚婢以上咸號哭失聲要其恭順慈柔有足感人者今年春疽發背逮



夏聞吾兒遵晦選補生員猶手製一花簪之疾革訣其嫂曰吾無子幸吾姪他日成立歲時灑我墳一盂飯無使作餒鬼逐食也悲夫悲夫尚忍言哉銘曰爾溫且惠既年之不長無號無嗣曷以永爾藏後有憐予悲者其弗忍爾哉

### 林子謙墓誌銘

嘉靖十八年七月甲戌禹中時太平府經歷錢唐林君子謙卒於家計至余輒往哭之慟視其歛昆弟壞壤而來僮婢以土纍纍然無所於主傷哉子謙之無後也他日其仲氏孚抱幼子示余子謙遺令其辭曰

嗟爾嗣子懋爾未有知爾後有知敬視我言毋忽亡父淳齋翁生五子昆舜弟愛孚爵各有分產直不滿五千余獨與婦劉黽勉治生修業而息之至有白金千鎰二十年間服食居室喪葬婚嫁學宦更徭諸費暨他逋負亦復稱是余業豈細哉嗟爾懋余無子爾本余第之季子余擇立爾爲嗣悉付爾後事饗余所遺慎余終續余祀無或悖義母余妻姊余女聚余僕妾無或不親爾未有知爾所生父惟撫爾教爾期爾成立務敦大義無爲亂階他昆弟宗族異財有年咸建大家富逾于我應無覬覦苟得之心雖然其以千



鎰之半分散余妻女若妾兄子諸弟妹妹之子下及  
紀綱之僕各有差無或亂余約嗟爾嗣懸尚慎守其  
餘哉又曰自發喪營葬經費告哀主名咸生時預畫  
悲夫悲夫維吾杭林氏自太常卿諱章者中翰起家  
而宗人子姓世以財雄邑中太常有從弟諱秀爲子  
謙祖秀生岡子謙父也淳齋其別號云妣吳氏子謙  
諱受號益軒以弘治五年冬十二月十六日生少學  
易爲郡學弟子輸資補太學生卒業自以兒時嘗墮  
地其容少偏雅不願仕請沾一命以歸乃授今秩云  
初妻劉氏產二男曰憲曰憲先後殤亡女曰文瑛

余同年金少卿之子印印亦太學生子謙有妾高氏  
再娶妻于潘竟無男以是意忽忽抱病而歿年四十  
八爾往年子謙得兆于五雲山葬母柩葬劉氏壙虛  
左今年 月 日厝子謙體魄亦治命云子謙善治  
生歲穰糴粟儲之齋出取絲續予之金穀視時低昂  
最善任人即其人不可與財通一錢不交也唯善賈  
而謹信者躬載重貨往遺之恣所爲不問人於僮僕  
多察察子謙與用事者同苦樂聽其自饒以故能盡  
人之力坐而待收歲率利什二而又節衣食之費競  
兢纖儉不事富人綺靡之習用是累致高資非有爵



邑祿奉之承椎埋干禁而富也其尤足多者恂恂醇  
謹鞠躬如不勝衣尊禮賢士大夫當人強盛時不妄  
納交若衰落急難之際顧捐貲周護尤篤退然有古  
長者風嗟乎子謙之義高矣雖不幸無後吾屬忍負  
之哉余爲銘其冢曰爾室翹翹爾樹脩脩爾音昭昭  
示我不佻風雨毋飄搖

許時久墓誌銘

余少時聞鄉先生許員外昌言爲名流世家云員外  
有弟之子時久能通其家易學而爲錢唐博士弟子  
與余爲同舍生雖未嘗銜盃酒接殷勤之歡然觀其

人自竒士沉毅有謀不甚爲容止無城府即有橫逆  
不忤也學師王先生雅重之異於諸生海陵徐侍郎  
時爲典學使者占試時久高等食餼廩應辟選矣然  
屢弗第也以貧故薄遊江湖間宿余金陵官舍夜中  
嘆曰吾世其中衰乎然余有子他日棄微名如脫屣  
爾子必無忘吾言哉夫是十載而當嘉靖十一年其  
子應元第進士時久遽投筆謝諸生曰吾不復搦尺  
寸之管與諸君競進取矣或勸曰盍忍須臾循年格  
應歲貢不當獲一校官以優游邪時久笑曰吾決久  
矣竟不出明年進士守泰安其父從泰安敕厲門內



謹肅無與比余聞之喜曰時久殆行所志哉又二年  
時久感風痺疾屬泰安更守泰州迎父養泰州卒其  
子官舍中嗟乎舉世好進而乃甘遜靡不有初而乃  
克終君子哉君子哉而泰州君自叙則云許之先世  
東安人宣德中有諱誠者順天府舉人入官左遷蘭  
谿典史道錢唐樂其佳山水於是卜居焉而許氏爲  
錢唐人蘭谿府君生兩湖府君諱紳娶番禺郁主簿  
女是爲先君之考妣成化十有七年六月壬戌生先  
君於鄉義里第諱龜年字時久晚稱平厓先生云初  
兩湖府君從其仲兄秋官大夫宦游先君年十二三  
奉郁夫人家居無僕妾之奉小勤薪水內怡顏色無  
不如郁夫人意及兩湖府君病疾在衽席期月先君  
不解帶日夜候起臥掖負之以視厠踰惟謹事季父  
兩山先生有恩禮在泰安時以其老也特歸省之涕  
泣豫爲治後事具備然後去皆謂應元曰汝非先人  
厚遺何以及此吾季父老暨汝之叔父皆貧也應元  
曰諾於是分俸皆三之一我姑歸王氏早寡先君見  
必泣數行命應元奉之終身其重倫理好義類如此  
誨諸子必曰士入奉父兄之教出則資朋友之益然  
慎擇交矣以故應元輩不敢妄有所與卒相磨礪期



通志卷四  
不矢節者先君之教也卒時嘉靖十有五年四月戊申年五十六矣明年冬十二月庚申塋于錢塘故塋在青龍山之陽夫人陳氏生丈夫子二應元泰州知州應亨東安學生女子二孫男女各一先生平日著書及他隱行多不盡載具蔡行人狀云銘曰維許太嶽之胤也子孫必復其始信邪蘭谿興之而未振司寇振之而未峻平厓宜峻而終吝嗚呼并不食未以汲膏而屯利后昆一命之貴如浮雲

張安人王氏墓誌銘

安人諱志廉故饒州府君王宜之先生之中女今蘇州別駕張君元助之配而進士洽之母也初王先生生四女各爲擇士壻長得楊天憲次陳良木次元助又次惠邦憲四君後皆科貢發身而陳張又先以子貴亦竒矣王先生可謂知人能得士哉先生錢唐人仕至府通判娶陳氏生安人端重寡言嫻于內則知文義年二十一歸于張君張故仁和大姓君時與兄刑部君競爽聲名籍甚先後起家取科第而安人逮事舅承德公姑潘安人暨陳氏姑其居常問安視膳一如禮潘繼室陳蘇州君所從出也終不以是懈于婦職處姊姒而下克諧以義壺內無間言當是時張



氏駸駸貴盛矣已刑部君喪而承德公喪三叔連喪  
二姑亦喪不數年凡舉六七喪門戶中衰蘇州君榮  
疾骨立殆不勝哀諸孤滿家唯安人恃上務順適夫  
意下期成全子姓心煩於慮而身親其勞久之張氏  
父子昆弟奮起通經術取青紫彬彬布列儒林海內  
號稱文獻名家蘇州君實倡導之而安人推轂之力  
爲多乃嘉靖二十年子洽登第奉 詔歸省侍自三  
省諸公及郡縣守令鄉大夫士賢豪貴戚咸造門敬  
賀車騎滿庭中而進士被服彩繡卷鞞鞫跪奉觴上  
壽安人大驩樂之已顧謂洽曰汝之上世豈不大有  
種德哉成進士者四人舉而未成者三人業而未舉  
者繩繩焉信先人之餘慶已然盛必慮衰吾爲吾兒  
懼焉唯恭慎可以免夫以故進士益恂恂退讓不敢  
以材辯加人居一載蘇州君念以子貴不欲競進取  
姑就一官以老乃闔室如京師蘇州之命方下而安  
人病病三月卒于邸嚮使須臾無死進士亦且任官  
有祿秩于朝父子內外奉給安人三十年之勤勞不  
猶有償邪而竟不待悲夫卒嘉靖二十有二年九月  
甲寅生弘治元年五月巳丑春秋僅五十有六蘇州  
君旣抵郡輒棄官歸卜卒之明年冬十有二月庚寅



率進士反葬安人於龍井之陽從舅姑兆焉安人初  
產四男五女存者男洽 賜進士出身吏部觀政女  
三洽有子曰格女一銘曰父則貴夫則貴子則貴荷  
天之休至矣若夫病不終於寢勞不饗其利斯固命  
之難全也又何異哉又何異哉

許小泉墓誌銘

嗚呼余於諫議許君之亡而益嘆夫君臣遇與不遇  
天實爲之云萬鈞之所壓雷霆之所震信諫說之難  
已然寄耳目於人將求聰明豈不樂聞讜論哉嗟乎  
臣門如市而欲劇切主上此見下節而遇卑賤必不

納矣不然忼慨徇名矯拂擊排強之以其必不爲止  
之以其不能已如是者身危而言亦塞吁嗟乎安得  
精白一心識時務引大體弗詭弗隨者今出入禁闥  
從容補過拾遺哉有臣如是人主安得不確然信驩  
然從邪若吾許君清慎莫與比時然後出言蓋其人  
哉得是人納諸諫垣可爲

明天子賀矣知君者方喜其遇合而日望有聞也立  
朝七日遽卒非天奪之速邪假令許君曠日彌久親  
近不疑 寵澤旣渥獲申其辯智焉必能舉

明主於三代之隆而君之勲名且與古遺直比矣惜



夫按狀君諱貫之字道卿號小泉世爲杭州錢唐人  
曾大父能大父鵬父鯨號秋崖處士世以醫名妣徐  
氏以弘治八年 月 生君少神采卓異群兒入  
小學有以勸學文示君者輒笑曰讀書將求利萬倍  
已邪其趨捨已如此年十三補郡學生治胡氏春秋  
能文章蚤擅時譽爲督學五清劉公賞識嘉靖四年  
領浙江鄉薦明年下第歸杜門謝交刻勵苦節益研  
精典籍藏修者十載志日堅定十四年登進士授江  
西吉水令吉水俗雕悍告訐不可懲君奉職循理不  
事威刑仁恕爲質而引義聽斷徐訥以禍福令勿終  
訟小民感其誠意風稍變焉吏故善舞文君廉其情  
置小篋以簿書自隨羣胥斂手不能與丙申夏不雨  
君禱神數素行誓諾移譴於身代民災已而雨降枯  
稿蘇歲飢君請于上官建議賑濟乃計戶口審虛實  
量遠近移民與粟務施實惠百姓賴以全活境內類  
歲猛虎爲害白晝噬人官私戒嚴君嘆曰苛政戕民  
猛獸在官豪強玩法猛獸在民吁嗟乎奚獨罪野虎  
哉悉罷諸捕者於是省刑罰減徭征察于吏民得宿  
惡寘之法獸忽遁去民有虎豹聞聲北渡河之謠云  
其精誠所感類如此邑人李令者故清白吏也貧不



克塋君心獨憐之捐俸爲治墓周其家至遇顯貴顧  
不爲私餽自奉極儉約布素若諸生時會當入  
覲凡土產貨賄一不爲備從者請之君叱曰殿最在  
清濁黜陟有明典持此何施嘗遺其友王德章書曰  
居官二載餘秋毫無取赤手東歸天地鬼神共鑒庶  
幾不負故人云其教子則曰吾無能開爾先聊以清  
白遺之其修潔如此部使者交章論薦被

命徵入十八年擢禮科給事中屬嚴冬入侍衝寒疾  
作家人無在側者卒于旅邸是歲十二月八日也春  
秋四十有五諸縉紳視歛所遺僅敝衣履古書冊俸

餘一鎰而已君初之京典宅爲資裝至是旅櫬無歸  
蕭然僧舍不克塋士大夫哀金助厥襄事嗚呼悲夫  
君平生悃悃簡易於物無忤人人樂與交游而君又  
對客恂恂不輒言卽有論議亦專對異辭不爲劇談  
高論尤重然諾以是言無不合者未第時喪母後喪  
父塋祭皆純孝秉禮父有遺妾事之如母叔祖母吳  
嫠居事之如其祖母其內行修謹又若此配沈氏男  
子一曰學郡庠生女子一孫男一曰文江學士卒之  
明年十二月塋某山某丘張冬官子文狀云銘曰嗟  
磻之多貴茲尺璧温而栗清越而訕試于



明堂始發其祥胡碎于牀問諸彼蒼斯丘用藏白虹  
其光

沈母虞氏墓誌銘

余方遭妹氏之喪哀不能文鄰生沈軾過余曰塋母  
有日矣唯墓中之銘先生業已許之敢請漫取其所  
自爲狀讀之不覺愀然增悲潸然而涕下蓋傷婦道  
之不易云其狀曰軾母虞氏諱淑清杭之仁和人外  
祖諱文娶范氏而生母與軾祖怡善公同邑因聘爲  
冢婦年十九歸于先君諱福處內有方妯娌無間言  
久之先君與叔父析居門戶衰薄又好急人之阨嘗  
代友人償責其友竟不酬或出財于人人多負之以  
是家益落徒四壁立已乃不復顧家挾醫術自資遊  
于下邑凡十餘載不歸而母徒竭其十指之力拮  
据捋荼紡績無間寒暑晝夜上以供饋舅姑俯則鋪  
糜不肖一簪不得着身怡公之病風臥榻逾年母  
朝夕侍湯藥不懈浣滌穢以人不堪度不可起廼  
豫謀棺衾諸物必敬必備怡善公見之謂母曰汝夫  
久不歸汝兒方九齡女工所得幾何若是其備邪汝  
孝矣汝孝矣竟卒殯歛如禮未克塋而祖妣王孺人  
又卒送終如怡善公當是時連遭大故且公家征調



百役所需唯母一人辦具不勝勞瘁於是得嘔血疾他日先君歸且病幾殆母禱天願以躬代割股肉進少間遂舉二喪合塋于九里松祖塋之次人皆稱母有古列女風云軾年十五六未知義方母謂家雖貧不可不就傳賈令受易于會溪李先生又使從游近山金太史之門受薛中離夫子良知之學軾雖愚劣不能顯揚庶幾弗見絕於賢士大夫者實母教使然也嗟乎母氏所以鞠我育我者至矣軾方求無負母志而母竟以前疾至不可藥哀哉昔軾叔父無子蚤卒而叔母無所歸軾母引與同居相守幾三十載人皆謂叔母得以秉節終身者吾母力云生成化十有五年六月十九日卒于嘉靖二十年十一月二日享年六十有三生男一即不肖軾孫女一卜以二十二

年冬十有二月壬申塋于天竺乳竇峰之麓與先君同穴云銘曰傷哉貧也生賴以養死賴以塋蠱賴以幹子賴以壯此丈夫之所難而婦人能當之其亦可賢也已其亦可哀也已

### 周處士墓誌銘

昔邵太僕銳論篤君子也介余交于沈賢良槩且十載未嘗見沈苟毀譽人今其論次周處士行云處士



少好讀書明大義然不以應舉邑儒吳景哲諷之曰  
力田孰如善仕答曰讀書求仕而已邪抑以養心邪  
處士止一子曰忝習法律以吏進或謂處士盍弗令  
業儒應之曰安知儒非吏而吏非儒也嗟乎處士之  
言微矣殆有聞哉維昔大道之世業殊德同敏而宏  
者儒樸而力者農文無害者史度才居業彼此不相  
為然詭經市寵侵畔取贏弄法徼利皆不為也是則  
同今世俗率榮軒冕賤刀筆而慙耕稼及徵夫誦法  
周孔委蛇而食者或恣睢罔利顧愧于質直寡文之  
夫亦奚以書為哉周處士安得有道之言而稱之余  
既重沈之許可且樂道先生遺風也作周處士墓銘  
銘曰維千一甫知名嘉善為周本始至壽生顯顯載  
生源厥配吳氏源有子潤字曰汝德稱怡筠處士不  
學諧道柔嘉樸忠靡欺詭讓宅昆弟澤潤三族身  
無華侈信義宣聞匪以財俠邑令至喜令謂爭民往  
質爾訟于周之里於維周氏無競于人人亦無訾  
帝曰爾潤飼我饑疇畀之冠裳天介遐祉八十有三  
年而富而康嘉靖癸巳冬十二月九日乃亡越歲乙  
未十一月甲申塋茲北鄉初娶于莫今祔繼室李氏  
同藏子忝將仕攜幼壽孫實主茲喪壻曰陳乾陸廉



懷銑女氏三良有笄女孫納釐沈燿聘曹叔房

過庭私錄卷之五

長沙府同知唐公墓誌銘

唐大夫珉字玉和其先楚之麻陽人洪武初徙成杭始籍右衛中所曾大父英大父愷父斌母何氏大夫生六年誦古文諸書補仁和博士弟子稍長事母兄以孝謹稱受易于姚子深伯而卒業沈侯朝授弘治五年鄉舉大夫與計偕詣京師退遊金陵講業于太學名由此顯數年歸不振然好周人之急嘗夜逢一人爲債家索之急欲死井中大夫瞿然曰某雖貧幸有贏錢解囊遺之其人捧泣曰公活我無以報公願



公及公子孫世取青紫如此囊物耳後人問知其人  
爲李全云初仕興國州守奉法循理治尚寬簡民有  
阮廷萬挾母愛與兄訟大夫謂曰吾亦有兄吾事之  
如父吾黨所知也具道所以友愛狀訟者感泣遂兄  
弟如初人以爲有古躬化之風居數年興國稱治  
朝廷聞其賢死爲長沙府同知興國民至建生祀事  
之初興國無城大夫下令令民城之且云今民雖稍  
勞期使父老子孫思我及寧藩變起列郡戒嚴州恃  
城以無恐治長沙政清如興國吉王有嬖臣柴誼怙  
寵殺人匿王所吏不得捕大夫往讓長史曰公知寧  
府事乎始寧府藏匿亡命有司不敢言竟怵邪臣計  
謀爲畔亂所由來漸矣今位在藩輔而阿縱罪人非  
訓也有司重以聞者徒望左右自悟改爾有如  
朝廷聞知遣一介使臣問狀公輩得無少損乎長史  
曰諾竟出匿者抵罪棄市境中肅然大夫爲人賢於  
已者譽之不容口不肖者誦之不能忍默以是同列  
深心嫉之以是坐部使者言落職長沙民懷之祠事  
如興國焉遺事在一菴文集中多故不著大夫自號  
一菴居士云娶沈氏卒乃娶王氏卒乃娶顧氏產四  
男曰字守容察幼孫男一女一嘉靖七年屬大比四



子咸與徵辟未集也三月辛丑晦大夫疾卒年六十  
八人皆悼大夫以爲大夫須臾無亡且觀諸子之成  
矣是年某月某日葬大夫於棲霞之麓銘曰  
直道守官天不益其謙需報後賢天不假其年夫復  
何言哉其處而未出也有澤以及物其奮而樹立也  
有祠以垂德斯足勒諸墓石

誥封南京刑部廣東司員外郎劉公合塋墓誌

銘

劉公諱淮字時又別號栢山世杭州臨安人曾祖曰  
叔章祖曰公遠考曰世弼司高郵倉妣葉氏公始爲

郡曹史郡守張縉器之曰劉某豈一祿才邪弘治中  
累考升仕版英國張公典宿衛辟公爲記室公閑于  
疏令上下無違度以定邊功授公戶部檢校仍贊幕  
府正德二年中要人覓樞務初要人監英國軍雅重  
公至是數召公與圖議所行公因得依違調護其間  
以陰庇善類久之念不可處乃日隱於酒要人後召  
之至則大醉不可與語要人怒竟出爲揚州府知事  
公實以智免也在郡克舉其職時奉檄行縣督逋糾  
慝遇有顯于朝者家負官鏹累鉅萬公獨盡法繩之  
境內稱平而銜之者亦深矣五年要人敗諸與密者



與焉人始稱公之智然猶以舊累謫戍或曰銜之者中之也久之克歸謂人曰欲知吾曩時嗾否須吾子孫崇替驗爾十二年公子景寅第進士逮

今上推恩封公爲奉直大夫南京刑部廣東司員外郎識者謂公克善終天蓋有以祐之公居家孝友奉伯兄源仲兄溥同居白首無私藏樂施予宗戚之貧與死疾無告之人傾身周之故雖經貴勢而沒之日家無餘財云嘉靖八年八月二十有二日乙酉卒于臨安里第春秋七十有七十月是年十有二月甲申葬其邑鳳山之麓合于袁宜人墓公始娶袁氏殂于正

德四年八月二十有二日前監察御史王汝舟嘗誌之略曰袁氏餘杭人其母與栢山公之母從兄弟也因聘焉旣歸於劉事姑如其母性莊默寡言笑睦於姊妹慈子而有方沒時年五十七銘而未石有待也今贈宜人生子一即景寅累官武選郎中公再娶大河衛千戶仲侯之女封宜人產子男三景宏景寰景窩女二其季許聘同邑郎繁側室女二孫男一曰贊孫女二徐鐸畢登各聘之銘曰生也同室沒也同日同歸於茲未無斃

胡子孝墓誌銘



子孝諱繼今大司馬胡公之長男大學生子忠之兄也公爲江西按察副使時知宸濠且反密疏折其機牙堂序左右率濠私人不可嚮邇而閉閣草奏贖書防理咸出于孝一手且外資戎備內謹禮法濠黨鈞染之不得公慮父子俱陷筮之遇隨之六三係丈夫失小子公臆謂失之言脫也吾係兒免矣子孝號泣曰大人捐身殉國完亦何用生爲公強之歸杭侍其母李夫人則又大泣抵家日夕泣慕固請復往以公固止之憤甚發瘍卒正德九年某月某日也年止一十有七遺言殯五載且十載必父歸乃葬至是公乃悟失子之占而明年果係 詔獄以非所言斥戍遼

陽正德十四年濠反公獲歸厝子孝萬公蕩之原又十年公以宮保尚書引疾歸以他故改葬公母馮夫人于子孝墓所因遷子孝而旁葬之嘉靖八年某月某日也歿至是餘十五年云嗚呼宸濠之變或死與事會而得贈者執馬箠從軍而拜官者比比也子孝之忠瘁有不如彼者乎公不自言相知有力者莫爲焉此子孝所以猶民禮葬也悲夫子孝蚤慧十歲知藝文逮沒時已卒業性至孝幼侍祖母飲食推甘造次扶衛惟謹祖母嘗臥疾踰年有問者輒計其傳變



劇易舉日以對後馮夫人之喪公歸自麗江烝然無宿貴子孝服勞爲多時年僅十二三綽有成人之度矣自能言至於勝冠公屢以自隨其啓處寒燠之節籍記器用下逮巾襪縛袴必敬必孝於僕媵以上靡弗愛且慎焉臨沒猶手啓父宜劄柔相濟善與人同共成天下之務故公尤悼之公口禮有爲殤後者矧吾兒冠不爲殤乃立族孫清源奉子孝後以紆其悲焉爾子忠謂鼎曰兄哲而長身居常沈晦寡言笑遇危難乃更䟽練敏給洞中事會侃侃然丈夫父昔赴寶慶守遽值劉六群盜犯境猖甚兄從容謂母曰父兵弱義必不免兒長子也當歛父乃罵賊死死忠孝吾志也謂純可奉母全父後其不死于盜死于濠蓋其素所蘊蓄云又曰兄於純猶慈母猶嚴師未屬續猶誨純曰我死獨爾任父事爾何以畀我目瞑邪純未有以償吾兄子姑爲誌墓嗚呼賢哉乃序其大節而銘之石泉用其自號者世系州里具載大司馬國史傳與馮夫人壙中銘曰於戲石泉子能衛社稷而死宜乎以成人禮葬爾

李母顧氏墓誌銘

初胡端敏公爲按察使時爲子子忠求婚曰母貴族



爲也唯母氏淳謹勿富驕者其女良媒以李氏女媁  
曰其母顧以賢孝聞約成而公坐宸濠構陷禍且不  
測人或訾警李氏顧孺人怡然安其女弗戚戚也及  
胡公起徙中拜都御史歸爲子娶婦李氏當是時李  
氏生氣姻黨爭賀而孺人意氣若平常時不揚揚也  
後胡公薨諸以勢合者率落落背去孺人遇子壻獨  
不殊胡公在時子忠曰余更歷盛衰存亡而不貳其  
心者余妻之母爾嗟乎孰謂制行房閨不足愧天下  
市道交者邪嗚呼可以銘矣按沈懋德狀云孺人姓  
顧氏諱王蘭其先海寧人徙居錢唐考曰璠妣陸氏  
成化二十年五月辛亥生孺人年十九嫁仁和大姓  
李繼先號槐軒翁產太學生琦及子忠妻子忠名純  
以胄子顯其次適邵經禮而夭其季納田輝聘皆庶  
女諸孫女許嫁者長柴祥次丁思學又二幼嘉靖十  
五年孺人年五十有三閏十二月甲戌病卒卒三月  
而槐軒翁亦卒塋日墓地具槐軒誌述中槐軒爲人  
後者也所後母王氏性固嚴遇孺人尤寡恩不異侍  
婢而孺人務曲順其姑迨其歿哭不絕聲於邑哀毀  
出于至誠其嫁庶女齋裝踰已女不佞時外家顧氏  
衰落或謂孺人所不足者非財也顧氏託屬肺附何



至苦若此孺人曰吾聞婦人內夫家不敢私與余與  
顧仲聲遊徵孺人賢孝類如是仲聲孺人兄子名鏞  
銘曰夏侯令女孺仲賢妻難焉不避貴焉不趨嗃嗃  
終吉悠悠載馳肅肅鳩鳩靡懷其私匪爵則重匪年  
則久不忝爾生爾則不朽

王良臣墓誌銘

王先生良臣者錢唐太平里人也其上世有諱復者  
當洪武間爲里正繇作京師已因遣戍柳州當行邈  
逝卒以其子斌代斌沒于柳塋于柳斌子曰銘仍居  
錢唐長子孫而銘仲子祥號勁庵處士者積貲起家

教子弟業儒彬彬稱賢家矣其弟祺仕至延平府同  
知祥娶蔣氏生子名軒是爲良臣先生先生少受春  
秋于叔父延平府若府君實受業于姚文敏公之門  
故經術精習有師道可稱述弱冠補錢唐弟子員會  
西川吳先生伯通來視學改廩于昌化昌化杭下邑  
也後先生受昌化貢入太學當是時天台謝先生爲  
祭酒建白諸生以貢至者令受業比年視可者始補  
校官先生於是執經祭酒門下稱高第焉如格得福  
建松溪縣學訓導抵家歎曰余幸先人厚遺以文學  
禮義名官已矣安能復事佔畢利錐刀之末哉年逾



五十未有嗣息余復何之輒投檄不赴陽明王先生所爲賦當年也家素饒于財性又喜客客至未嘗不設醴座上常滿交驩多天下賢豪長者海寧張方洲先生仁和胡端敏公暨陽明先生號天下士皆樂與先生游以圖書文墨相爲引重先生益浪跡山水管陟天目探禹穴上釣臺登齊雲躡九華對客長嘯悲歌恍慨不復問家之有無客或竊其貲去亦不問又時時棄責折券晚年家稍落賓客益散獨藝菊後圃更號晚香道人先是號庸齋一字弘載云有子勇一曰元能通其家學初仕訓導休寧縣學實能恢弘先生之志者二女一嫁湖州守禦所百戶張潛一嫁餘姚進士錢應揚余外姊汪夫人出也先生始娶于費無子卒祔塋故丘先生卒于嘉靖十有四年秋八月丁酉年八十有三矣卒之明年冬十二月甲申乃塋墓在三台山八盤嶺昔漢儒董仲舒以春秋起家博士仕竟不達疾免家居終身后其子及孫以春秋學至大官今先生經明行修成而不居其貽謀已厚矣然先生不遭時不服官政無他奇節可紀顧其平生孝于祖考友于弟妹慈良醇謹耻言人過閭里少年犯之不校藹然鞠躬君子也鄉飲大會嘗推先生爲



祭酒焉銘曰不知其人視其友不食其祿視其壽不顯其躬視其後

勅封孺人羅氏墓誌銘

羅孺人者東臺余君之配也羅氏世柳州柳城人考諱大經任上杭縣學訓導以其子貴封南京工部虞衡司主事妣劉氏弘治三年八月二十有七日孺人生自爲孩提時已端重寡言咲大母彭嘗謂人曰此兒他日必貴已乃許聘同郡余君年十五笄而嫁執婦道儼如老成人時余君侍其父奉直公守合州孺人從之事舅姑宦邸六年孝敬彌謹已余君歸補學

官弟子孺人芝之治內有家法而余君獲專務學正德八年領廣西鄉薦家人走報曰夫人從此貴矣乃孺人喜不見色自是益勤于家凡筐篚絲枲梁醯醢之屬雖饒不以狼戾非歲時服飾綺麗不御也夙夜攻其女紅不稍懈弛施于三族喜有慶戚有恤其孤嫠則時招致而飲食之漿茗供饋必盡其歡或留處信宿燕待不倦如是者幾十載及奉直公致政居家不問有無喜延賓客孺人職中饋所需惟時無弗豐潔能養厥志嘉靖二年余君登進士明年授杭州錢唐令孺人從之邑大政繁出入戴星孺人亦夙興



夜寐執巾櫛左右且膳師教子內言不出于外越三載徵縣令拜南京陝西道監察御史歲庚寅

今上覃恩勅封羅氏爲孺人明年孺人隨侍御君歸省覲被其章服上堂禮舅姑退見姻戚姻戚咸賀曰夫人果貴顯矣孺人又不色喜顧以舅姑老而夫從王事爲念遂留身備養舅姑安之若不知其子之去膝下也無何侍御坐論劾時宰逮赴 詔獄已因被擠左遷州倅東西播越弗遑將其父丑五年而無離憂者孺人力也十六年冬奉直公捐館時余君留滯荆楚孺人攝喪事如禮以俟君歸十九年冬余君起

復如京師屬孺人曰吾母老矣汝其代吾善養孺人曰諾是婦職耳當是時諸妾媵子婦滿前猶親調滄滄奉其姑李太宜人姑憂亦憂姑喜亦喜姑或不悅即俯首受訓戒競競不敢喘息太宜人少不安輒躬侍湯藥晝夜衣不解帶或假寐伺動止疾已乃復初二十年余君量移杭州理官杭故治也士大夫稔其內行相與唁君乃知留孺人事母夫人之故是年冬孺人忽遘風疾遂成偏痺二十有一年夏四月丙子竟卒年五十有三子男五長曰齊太學生曰亶曰玄俱鄉試中式舉人孺人所自出其曰方曰立女一側



室出也。孫男四。淪之潛之澄之冲之女孫三。余君聞計泣曰：與人共事，父母長子孫垂四十載，而病不及省，不與歛，安用微官爲母？且何依？將拂衣去。會命下，遷理官爲松江郡丞，得以其間歸。今年冬十月壬寅，葬孺人于郡城東南社灣龜鷺之間。屬其子師周鵬舉爲狀，余爲墓銘。銘曰：爲女爲婦爲母爲祖，德既孔多，受天之祉，豈其享年必齊？上古龜鷺有祥，發茲幽戶，二惠競爽，纍纍印組。

姚母仰孺人墓誌銘

嗚呼！士大夫承家昌後，匪獨外德茂也。要亦有內助

焉。或女而不婦，能婦矣。或弗能成子姓，有子矣。或弗知教，若是乎？文德之難全也。有能全者，耐書特書，不一書而足，孰謂已重乎？余友唐子鎮以道自任，弗爲不試之譽。其狀姚生之母畧云：姚母仰氏諱元貞，歸安荻溪里人也。家故饒于財，曾祖麒，祖震，考黼，黼別號梅南處士。妣車氏，孺人生而循教，授之內則，顓顓奉以周旋，弗敢墜。年十九，嫁爲蘆溪姚君旭之妻。逮事其舅，月閒翁，初月閒與梅南相友善，其家聲亦相倚。後梅南益振，月閒業稍落，孺人宜于姚，弗以盛衰故懈于婦職。已而舅娶後姑，事後姑如禮，後姑竟無



男舅歿姑老。享善養二十餘載。不自知爲繼母。以孺人終始執婦道云。初蘆溪君春秋鼎盛。積思經術。而月閒翁職鄉賦。獨倚辦所親。所親多侵漁之賦。益虧孺人夫婦。明知其繇。懼傷親之心。弗以告。至破產爲償。壺內無間言。他日有司徵賦急。孺人不俟翁言。輒傾其資裝。助輸縣官。以故月閒負累數百千。未嘗抵困辱焉。蘆溪素豪邁。施舍不貲。而孺人左右彌縫其間。舒歛有術。審其所與。要非苟而已。及蘆溪銓授高郵州判官。孺人從之。三載罷歸。無長物。而孺人掇拾遺貲。稍稍集故業。畢方婚娶名家。且給其子翼師友。

當世賢士大夫。孳孳不倦。久之高郵君捐館。孺人晝夜哭。寢苦茹蔬。盡瘁。凡百役及禫而病矣。病革。與翼訣曰。吾憶曩時。爾先君四十不舉子。今幸有爾。獲從文學之列。諸大夫稱之曰能。吾復何憾。唯爾先君殯猶在堂。母少延。遂卒。卒之日。爲嘉靖二十年八月丁巳。距其生成化十二年八月丙申。春秋六十有六。男子一翼也。歸安縣學生女子四。一適潘尚書子密。一適錢縣丞子汝周。一適孫千戶子熙道。一適茅進士坤孫男。二曰孟俊。曰仲賢。翼二十一年冬十二月庚寅合葬。考妣于蘆溪里之陰。業已求太史氏爲高



鄗君誌而復屬余誌孺人按狀爲銘曰一富一貧可  
觀其貞一貴一賤恒德乃見敬爾姑翊爾夫救爾孤  
返爾初

周母孫氏墓誌銘

鹽官周生甸謹信而文比喪其母痛哭稽顙謂余曰  
吾無以報吾母之劬勞也已母乃同邑孫仲道之女  
先方伯暉之孫而叅政子良之曾孫也詩禮世家少  
習儀訓歸于我先君易裝送爛然盈門我周世居洛  
塘實爲郊外旣嫁頓從田舍樸素之風不以貴驕人  
先君數出遊名都有少年之好吾母曰使我言之而  
改不免爲妬婦言而弗入是反目也我婦人也知貞  
順而已俄而先君卒于外館當是時母年未滿三十  
皤然老姑藐爾孤甸以瑩瑩遺婺俛仰其間每一哀  
至輒撫膺大慟嘔血幾斃顧父妾宋氏少而麗勉以  
大義誓共守死靡他或秋風雨夜然燖燖對績悲而掩  
戶相泣奮而攘袂激烈如是者非一朝夕矣竟吾祖  
妣考終忘其子之夭折成宋之節至于沒身若不知  
所天弗存者皆吾母之力也甸少惑于博奕母泣而  
責之曰此非所望于子也提博局投諸河及有他過  
輒愀然弗與語憂憤形于色甸能改乃復常甸長而



思爲門戶計或引以待次行省承差母不懌曰此非  
所望于子也會邵康僖公歸自翰林旬以姻家進謁  
間道母意康僖勸之學於是稍習經藝蟬蛻胥徒之  
中而列于學官弟子母喜曰吾家素業也今有望于  
子矣他日陽明王夫子倡道會稽天下士無貴賤響  
應旬不自量輒負笈往從游獲聞心學緒論歸告于  
母母大喜曰吾兒能進于道吾滋有望矣自先君歿  
四十二年志操皦然如一日以故閭胥鄉大夫至于  
縣長臺察移檄嘉其節行勞以粟帛勒姓氏于旌善  
亭中幾欲表聞未上會卒而止實不肖孤緩不逮

事罪爾悲夫悲夫吾何以報吾母之劬勞邪卒之日  
實嘉靖二十一年秋七月丁卯享年七十有一子男  
唯旬一人女一嫁爲郭蒙妻旬有五女一男卜明年  
二月甲申祔塋于先君壙在仁和黃鶴山朱頂北麓  
惟先生惠而章諸墓銘母之劬勞尚不沒夫余聞而  
哀之嗟乎世好言古今人不相及豈其然乎今觀周  
母之不矜庶幾少君孟光之則義化其姊庶幾莊姜  
仲氏之風愛子以德庶幾孟母屢遷之意故家詩禮  
漸涵之助要不可誣云爰爲銘曰錦衣煌煌碩人其  
良公侯之孫白兩是將言歸于周不顯其光爲絺爲



綌服之莫忘嗟嗟兩髦逝被桑間子未有知母也華  
顛有娣任只淑慎且妍先君之思交相勉旃子姑博  
奕母曰無逸子爲公僕母曰無辱青青子衿悠悠母  
心欲慰母心莫佇母身骨肉歸于茲塊氣常存歸哉  
歸哉斯爲完節之墳

梅月周翁合葬墓誌銘

余聞之沈生軾海寧洛塘周氏蓋鉅族云其先趙宋  
之汴人元季有周濟者生輔輔生質質娶宋氏生三  
子明綱義義字尚濟別號梅月以壽得

賜冠帶梅月翁生于明正統甲子十一月七日至正

德己卯十一月二日卒配虞氏同邑瓊之女生正統  
壬戌十一月八日卒嘉靖庚寅六月二十六日子男  
二長曰淮次曰洪女三側室子男二曰涪曰淞女二  
淮先母氏卒洪十嘉靖十有三年冬十二月甲寅合  
葬考妣于宋家村以兄淮祔實舉三喪焉嗟夫邦君  
千駟民無得稱不若古之逸民人到于今稱之乃今  
人則羨簪纓族誇詡閭閻否則材藝技術之夫市譽  
蜚聲生駕頌贊沒崇表誅惟恐不流今信後也若閭  
閻敦行善良孝友力田遺老顧闈沕無載述曷由追  
古風乎梅月翁闈沕者也余幸載焉始翁壯出分悉



讓其故田宅與兄而別治生起家務稼穡桑麻本業蓄賤糶貴馭僮僕數百千指咸盡其心力用是累產千金然時時施舍田租息錢視不能如約者數折券里有喪無以爲歛翁往往與之棺邑中繕津梁築堤道建祠社卹饑阨諸義舉鮮不勸分于翁翁輒資之不以空乏爲解縣嘗繇翁爲糧長他糧長率厚徵所部私其羨餘翁顧發私廩代貧甿輸逋逋者償或不讎翁輒曰止所謂富好行其德者也此其人可以貴勢聲華少之哉較之末業姦富爭斗尺而鬪于牆者顧不宜有稱哉虞氏事姑孝姑宋有疾鑿弗愈巫亦弗愈虞禱天願躬代姑死潛判股肉哺姑已而宋疾瘳觀是一節其平生可槩矣將天比德以祚周邪抑刑于者邪具宜銘銘曰木豈青黃食豈河魴履貞服樸寔曰民良匪華而懿匪爵而康亦越孝恭思日贊襄偕老爾室同穴爾墳馮邪光邪冀缺賓邪

姚孺人墓誌銘

嘉靖十有五年秋九月丙子門人沈漢母姚孺人卒年四十有五明年八月其父鴻臚君亦卒禮所謂父母之喪偕葬先其輕者也是年月日將葬孺人于王泉山之原前期漢持其婦翁別駕陸君所爲狀請余



銘墓初余聞孺人屬纊則曰孺人名家子歸于巨室  
伉儷命夫襲統緒而飮膏粱者三十載有子列于儒  
林雖未老而逝亦不云不幸矣自其殯于堂也然後  
甚悼孺人弗可作已去年余吊鴻臚間過金太史太  
史語余文昭且不久時鴻臚方強盛余愕然曰子知  
天道邪抑人事也太史曰人事實然文昭素剛非其  
內子莫能釋其感情不平之氣今日日親米鹽碎務  
警枕自語達旦亟起督察內外毋須臾間能勿瘁乎  
乃今知太史誠先見云嗟乎使孺人不折則鴻臚未  
亡縱鴻臚亡而孺人在諸孤當不如今日之總總也  
悲夫仁和爲杭大邑多千金之家而官道姚氏褚堂  
沈氏咸彰彰者孺人出姚氏諱淑龍字冲明肅齋翁  
諱楷之長女也年一十六嬪于沈氏鴻臚君諱鑑文  
昭其字正德間嘗爲鴻臚寺序班自號竹亭人稱沈  
竹亭云孺人平生柔婉孝慈逮事舅姑鴻臚宦京師  
留孺人事舅姑于杭數年舅姑安其孝如一日舅慮  
孫枝未衍爲鴻臚置三妾孺人處之誥誥如也而鴻  
臚顧益敬愛孺人孺人多男廼三妾咸無男而鴻臚  
罔私昵嫡庶之分整然閨閣中無嘻嘻者要之正內  
有道不可誣也其相夫無敢專行然覆露諸子洽比



婚友終其身沈氏父子兄弟無間言自士大夫賓旅以下多親附鴻臚鴻臚爲益彊者孺人有力焉漢業成而不利子有司孺人恒慮其獲譴於父曲爲調護以故疾亟時致漢籲天割股求救良恐失所恃云孺人產子男三漢其長也次日壽與兄先後補縣學弟子員最少者曰湘女二長壻郡學生張深李適邑人陳表其側室女三人一嫁舍人江岷一嫁學生陳謨一未嫁孫男一人曰梗余聞鴻臚有姊子負鴻臚之貲并姊見踈而貧不能自存孺人則潛遺之錢米諸用物顧若已私親然唯恐夫知之再歿夫問所遺言第曰君幸多財而寡兄弟奈何令老姊坐困若此妾死願以爲託鴻臚感泣曰吾有姊而重以爲吾妻憂邪遂爲姊弟如初信若所聞雖古列女何以加諸銘曰三代崇替咸繇婦德婉婉孟姚寧不爲則敬戒君子剛以柔克母忘鵲鴿樂我琴瑟式穀爾子勿僭勿忒存俾爾昌亡俾爾路令妻相家譬彼相國宜爾後人未求封殖

徐母潘安人墓誌銘

安人姓潘氏諱淑端封南京刑部廣東司主事潛江徐公之配故臨江太守顯之母也考曰珎妣王氏世



爲仁和人安人生二十五年乃歸徐公徐公諱聰與潘同里閑居浙江之濱通四方商旅招延飲食勞來日不暇給而徐公雅有大志雖處閭閻豪爽不羈當是時舅歿姑老而性又嚴伯叔同居內外尊卑疏戚人人殊也而安人外贊其夫內育諸子曲處宗屬不失其歡心尤致養其姑勞而不怨拮据捋荼相與起家夙夜盡瘁有不可勝道者矣教子苦學分甘絕少徐門之大安人實有力焉年踰五十以子爲郎受璽書褒封安人駸駸貴盛矣時猶躬辟纊治麻枲率勵諸子婦曰庶朝夕以儉情耳封君旣歿就養臨江臨江君素孝祿入惟安人所用安人顧訓勤昭儉猶有布素之心焉曰毋忘吾與爾父起家之艱云臨江若以奏績歸省無何遽卒安人哭之慟蓋自是衰矣逾二載爲嘉靖十有七年秋嬰疾其季子太學生頡歸自京師拜母牀下因會諸子諸子婦昵昵語曰吾起荆布爲命婦始約而終裕年幾七十死亦何憾不幸者老而見壯子之亡也命矣夫命矣夫八月辛丑朔竟卒邈其生成化六年四月十三日春秋六十有九矣以是年十有二月丙寅啓潛江翁之兆而合塋焉所謂妙音山者也安人有丈夫子四人顯最長次



順次頰次頡其少而殤者二人男曰璧曰珍女曰玉  
瓊孫男四人立言立心立德立宰孫女二人曰  
曰余自束髮與臨江君游得升堂拜母當是時  
安人穆穆嗃嗃憂深而思遠者也巳同舉于鄉先後  
登朝申以婚姻之好數拜安人于于申申而競競焉  
巳貴而勤巳富而儉者也逮今見安人遽皇皇如有  
所失氣索然蓋矣嗟乎昔歲戊子余哭潛江翁丙申  
之冬哭吾臨江今茲戊戌哭安人焉僅十載而臨其  
父其子其母三喪崇替之感何如也悲夫悲夫銘之  
曰始之者艱享之者謙變之者天歸之者全式穀綿  
綿以莫不延保茲萬年

陳文量墓誌銘

止德戊辰余始識文量于山寺摩娑古碑誦文辭琅  
琅不暇交一談然未嘗不想其神情俊逸而篤志慕  
古也癸酉秋余下第卒業邑庠俵俵焉無所依會文  
量送婦翁歸自河南館余于其室由是益知其經術  
深造性行淑均遂定交焉凡風晨雨夜相與磨礪切  
磋無所不至至或文量烹飪而余躬執爨笑相約  
曰他日無相忘去年或傳文量將應貢然文量實非  
有先人之志嗚呼文量竟不成名巳矣悲夫余何忍



銘吾友邪。向與文暈同遊者。朱子上爲知已。子上爲之狀行。余又何敢弗銘。其狀畧曰。君諱金。字文暈。一字子容。別號平村。學者稱平村先生。其先陳氏。大梁人。宋南渡。有松隱公者。始來居錢唐之甘泉里。世稱鉅族。至君之祖諱昇。輸粟授七品散官。考桂軒公諱侃。妣費氏。生四男。君行三。少穎敏。孝友。桂軒公暇。推擇司鄉賦會。詔蠲租。公負義爲小民愬于部使者。使者怒。抵公重典。繫獄逾年。君時未冠也。痛父非辜。奮身援解。竟得脫。而公且以疾卒矣。卒後。家冷落。鄉鄰惡少謀侵之。君矢心殫力。偕諸兄弟上慰母。比下

御傭僕。夙夜孜孜。勤生約已。唯懼墮餘業。貽先人羞。遇縣吏追呼徵集繇賦。恒親造公庭。罔敢或後。一日失期。幾爲暴吏所辱。退自嘆曰。吾遭家不造。若此而不克自樹。顧僕僕屈身卑役。其何以爲丈夫邪。遂憤志儒業。學周易經傳。會有宋先生瑛者。無子。止一女。擇壻得君。贅焉。宋宿儒。其經術有師法。由是君日聞所未聞。經義文辭益精。補邑庠弟子員。學使五清劉公。校其藝。高等。給廩餼。久之。四方俊彥。赴講席。被陶鎔者益多。如茅子瓚。狀元及第。方子九叙。舉進士。文詞名一時。此其尤大較著者也。亦足以彰其教。第其



經義一本於雅道弗善作時俗語以是數詘于有司性善吟詠對景能賦至於經國籌邊地理天文農圃鑿上凡資世用者咸窮其奧有古博雅風平生真率與物無忤遇義不可必毅然力爭不少遜嘗置祭田四時率宗族子姓供事教以尊祖敬宗友愛睦族大義遇考妣忌辰必素服戚容却事默坐終身弗替友愛兄弟尤篤宋先生後仕爲河南南陽府學訓導致仕歸卒君養妻之母如母宋族之貧者葬之育其遺孤與朋友交誠心直道有過則諷之改有就謀焉必爲之區畫詳密如已事故人人樂與之交處家甚約

衣食纔適温飽交際往來弔賀宴飲物薄而情密嘗曰是盡吾心量吾力爾矣非敢爲吝也苟強厚脫力不繼後將失禮較今之薄不猶愈于已乎其施於家者如此嗚呼據君之學足以發科而一貢不偶才足以用世而一技不售儉足以起家而身後無積藏慎足以永年而一疾不可救藥悲夫其著述有周易折疑錄有詩文若干卷藏于家生成化丁未十二月四日卒嘉靖癸卯三月十有七日年五十有七配宋氏男一曰宗器錢唐縣學生嘗從余學蓋能繼志者也孫男一曰元忠孫女一宗器卜以卒之明年 月



日塋君黃泥嶺之新阡云銘曰明經可以經世而目  
爲樸學孝廉可以廉頑而笑爲齷齪華辭者高科尚  
通者卓犖嗟哉陳生宜爾不能與之較

### 陳恭人墓誌銘

正德丁丑歲舉進士三百五十人予與仁和陳遂初  
皆在選中遂初年最少學最博器識最闊遠予甚親  
重焉時從容語具悉其祖母戴恭人之賢蓋遂初在  
襁褓時喪其母施氏而恭人遂顧腹之若已所生孩  
提有識固示以禮及成童屬祖父京兆公遭時多虞  
弗暇顧家官罷且嬰疾恭人深慮遂初失學迺爲擇

賢師傅教之益令親禮名士厚爲奉給賓友紙筆諸  
費俾得肆力于學其成就不凡也有以夫遂初登第  
而京兆公卒未幾遂初亦卒今墓木拱矣而恭人乃  
卒嗚呼以恭人鞠育遂初之恩同於罔極而遂初曾  
未及送恭人之死而先隕歿寧不遺恨地下邪恭人  
之卒實嘉靖二十年六月廿有一日也去遂初之死  
已二十年矣越明年冬十二月庚寅嗣子宋拱恭人  
之柩將塋于錢塘縣大慈山啓京兆公之壙而合窆  
焉以造士馮晉叔之狀來徵銘于予此吾亡友之志  
也義不敢辭按狀恭人家世錢塘人江西饒州府照



磨戴公好學之女也母許氏生而貞慧能通論語孝經大義照磨公無子唯恭人一女擇京兆公而贅焉陳氏自宋元來簪纓相襲具載其家乘公未第時每早暮讀恭人治女工輒先起後臥以相之無倦公第進士爲南京大理評事進寺副寺正時勅封戴氏爲孺人及出守池州府誥封孺人爲恭人遷山東叅政奉勅督課農桑整飭驛傳齊魯之民至今稱之恭人內助之力爲多已而擢湖廣右布政使當是時逆瑾用事公以非罪逮至京久之得釋轉福建左布政使擢應天府尹無何奉詔致仕恭人意甚安

之與公歸鄉里公唯日飲無他一切委諸恭人恭人攝事唯謹公歿亦如之迄今垂三十載陳之生聚日大以蕃由恭人主家有方不可誣云平生勤儉樂施與唯不喜釋老既貴能善事其姑處妯娌無驕色族人及內外姻婭貧乏不能舉婚喪者輒贖公賙之隨其親疎厚薄爲差逮下有恩其行事多與古內則合者距生天順己卯九月十日享年八十有三初京兆公無子恭人爲置二妾竟無子公乃以其兄之子宋爲子生孫男二長進士直遂初其字次方嘉靖辛卯舉人任四川成都府推官孫女二曾孫男二長曾太



學生次春仁和學生曾孫女二玄孫男二女一銘曰  
赫赫京尹絕而弗隕振振陳宗繫誰之功利爾子姓  
于無窮

郭通判墓誌銘

贛州府倅郭公諱廷佐字師夔其先系出唐汾陽王  
世爲關中著姓自諱性者仕元來浙爲金華縣尹卒  
因塋金華尖峰山金華公有子曰宏爲杭州路仁和  
縣丞卒因塋杭州秦亭山子孫遂爲仁和人仁和公  
七世孫曰宗信

皇明成化甲午浙省舉人爲荊州府通判荊州公賓  
興之歲二月三日其配仲氏舉長男是爲贛州公公  
長而受易於沈廉州綸補杭州府學生正德丁卯浙  
省舉公第十九人時荊州公已歸老于家鄉大夫士  
咸造賀曰可謂克肖矣越十有三歲庚辰

廷授公江西贛州府捕盜通判諸大夫士又相賀曰  
誠爲克肖矣贛當西省疆場犬牙閩廣且崇山海澤  
伏慝數盜 國制命御史中丞董師以控制之闢軍  
門于郡而中丞下設兵憲兵憲下設捕盜府倅倅之  
重且難可知矣而姦民偵知公長者意其不諳戎務  
頗易之公旣受事乃赫然振厲號于師曰境外人寇



不無招盜者也境內竊發不無橐盜者也器械不利  
是無士卒也卒不素習是無帥領也賞罰不明號令  
不允是無國典也方今務申軍法時蒐簡精鍛礪  
夷巢穴詰鄉導無或不如約束於是盜失馮依士樂  
用命屢討捕劇賊龍湧等殲之然公仁心爲質卒伍  
有貪功者縛良民詣麾下指曰盜也公廉知其枉輒  
釋去而罪其卒如是者蓋累活數十百人奉職五年  
枹鼓罕鳴中丞聶公賢褒之曰清慎公勤王兵憲度  
亦云廉可取勤可稱剗不吐柔不茹咸嘉其共濟云  
爾公自爲諸生感怔忡疾間瘥間作綿延逾二十載  
至是疾復作告滿三月公請如令輟俸中丞公令勿  
輟重與告又三月公請謝事去中丞不聽去兵憲亦  
不聽去郡太守力不聽去郡吏民咸不願公去而公  
愈懇請去凡七請乃得致仕中丞潘公希曾稱公守  
官素謹飭郡以禮敦送用勵恬退時嘉靖丙戌春正  
月也公年僅五十有三歸而荊州公尚無恙偕仲安  
人倚閭笑迎二弟廷贊廷相迭爲奉觴稱壽衍衍如  
也公因扁所居室名一樂自號東洲道人歲時出謁  
慶吊展墓父子冠蓋垂銀純采先後一色道傍觀嘆  
嘖嘖曰不圖今代復覩賢哉二大夫初公娶江秋岷



澄之女產二女子長嫁邑人毛鴻奎季嫁臨江太守  
徐顥臨江前爲郎時封其妻爲安人荊州公旣沒  
鴻奎廷相胥亡東洲公竟無男子嘉靖十四年乙未  
春公疾大作家人請迎醫公止之曰吾非踈於攝生  
也吾棄官以息形寧神歸又絕世紛屏嗜欲日與靜  
者居脩呼吸導引之術吾非踈於攝生也而疾竟弗  
損命也夫命也夫適臨江君返自朝會拜公于牀下  
公執其手曰余先世有大功德于唐子孫代有顯祿  
余死無嗣其中微乎天其或者發祥吾女吾亦有施  
于後世哉唯子勉之是歲四月丁未東洲公卒享年  
六十有二其弟廷贊率廷贊子府學生世賢廷相子  
世良卜年 月 日塋公秦亭山祖塋之次以臨  
江君所哀公行屬余銘墓余觀公恂恂醇謹人也聞  
其在郡嘗受檄賑饑吏請如故事下邑里書饑口勾  
稽相當籍成而名給之粟公蹙頰曰若是其需也待  
哺者僵矣亟察舉郡中豪長者部勒之散遣輸糧就  
便地某所約饑甿幾何給粟幾何某幹畧可辦給幾  
何咸中事宜賑無後時又嘗署權務商賈無橫征公  
家有贏財由介且恕也向使爲州郡長吏用敷其愷  
悌優柔之政或筦錢穀一司雅稱其資廉平不擾豈



進履本錄卷五  
不綽綽乎循吏哉。顧使擢甲冑，履行間，日尋干戈，屠  
馘之事，誠非其好也。雖然，辭榮求志，較然不惑，夫去  
就死生之分，賢於人亦遠矣。宜爲銘，銘曰：勿謂退速，  
高風洋洋，勿謂無勇，其倩孔良，矧有弟矧，有弟之子，  
亦永其藏。

銘施長史魯自撰墓誌

先生之自叙云：爾後三載，爲嘉靖十有四年。先生年  
八十八，七月壬午卒于忠清里。蔣氏宇下，乃僦居也。  
越九月壬午，其室人從其子壻陳宋合葬先生于王  
恭人墓。始正德五年，荆王䟽先生賢，且久請增秩

四品，而劉瑾甚之，矯奪先生官，勒歸故郡。瑾旋伏誅，  
有詔徵先生復用。先生自以年及不應召，遂終老  
于鄉，而無一畦尺椽之藉。東西僑賃，不常非其義弗  
受也。嘗有施姓書生，餽粟三十斛，求冒先生族。先生  
曰：余唯不爲冒昧之事，以至於斯。固卻之時，方絕糧  
處之晏如也。竟藜藿不給而歿。嗚呼！隨夷之操，今復  
見邪？世之持梁鬻肥，居大第，開館而飽死，奴豎者，彼  
何人哉？亦可少警矣。雖然，天與之年，不與之子，毋亦  
不好夫清白吏邪？銘曰：首路廉貞，或可及也。固窮以  
終，昭獨立也。家人忘貧，盛德襲也。室有萊婦，允相翁



也。妻以夫榮。匪爵級也。仁焉無後。紛用泣也。玄冢巋然壯。吾邑也。

臣



